

CENTRALNA BANKA
BOSNE I HERCEGOVINE



ЦЕНТРАЛНА БАНКА
БОСНЕ И ХЕРЦЕГОВИНЕ

INFO CBBiH



U ovom broju:

GUVERNER SOFTIĆ I CBBiH DOBILI
PRIZNANJA



ŠERIF ISOVIĆ PREUZEAO DUŽNOST
ČLANA UV CBBiH



IZVJEŠTAJ O REVIZIJI RAČUNA ZA
SERVISIRANJE VANJSKOG DUGA



GUVERNER UČESTVOVAO U RADU
MEĐUNARODNE KONFERENCIJE
O TENDOVIMA U BANKARSTVU
I INFRASTRUKTURI FINANSIJSKIH
TRŽIŠTA



MARICA BULIĆ ZAMJENICA
GLAVNOG INTERNOG REVIZORA
CBBiH UMJESTO ANGELE MEDIĆ



CBBiH U SARADNJI S EFSE
IZDALA PUBLIKACIJU
„NOVKO I NOVČICA U SVIJETU
NOVCA“ I LETAK O ŠTEDNJI



Izdavač: Centralna banka Bosne i Hercegovine;
Adresa: Maršala Tita 25, 71000 Sarajevo

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za publikacije i biblioteku i
Služba za protokol i prevodenje

Web stranica: <http://www.cbbh.ba>
E-mail: pr@cbbh.ba
kontakt telefon: (033) 278 123

GUVERNER SOFTIĆ I CBBiH DOBILI PRIZNANJA



Na 37. Ceremoniji proglašenja najboljih poslovnih ljudi i preduzeća u Bosni i Hercegovini, održanoj 7. 12. 2017. godine, guverner Centralne banke BiH (CBBiH) dr. Senad Softić ponio je priznanje za najboljeg evropskog menadžera u Bosni i Hercegovini u oblasti finansija, a CBBiH priznanje za izuzetan doprinos makroekonomskoj stabilnosti zemlje.

Tokom ceremonije, koja je održana u Banskim dvorima, u Banjaluci, u organizaciji Nezavisne agencije Evropskog udruženja menadžera i časopisa „Euromanager“, dodijeljena je 21 nagrada najuspješnijim menadžerima iz Bosne i Hercegovine u više kategorija.

Povodom dodjele ovog prestižnog priznanja, guverner dr. Softić zahvalio je Direkciji na nominaciji, kao i svima koji su CBBiH i njega predložili za prestižne nagrade i to baš u godini u kojoj CBBiH obilježava 20 godina rada.

„Ovaj jubilej je dobar povod za radost i ponos na sve ono što smo učinili i činimo kako bismo ispunili našu zadaću“, rekao je guverner te izdvojio monetarnu stabilnost u zemlji i visok nivo povjerenja u domaću valutu kao uspjehe po kojima je rad CBBiH prepoznat. „Ovo priznanje je potvrda da je CBBiH prepoznata i priznata kao profesionalna institucija i da se cijeni odgovoran pristup poslu mene i svih mojih saradnika, odnosno uposlenika CBBiH“, izjavio je guverner Softić na ceremoniji na kojoj je bilo okupljeno više od 400 zvanica iz privrede i javnog života.

MR. ŠERIF ISOVIĆ PREUZEAO DUŽNOST ČLANA UV CBBiH

Dužnost člana Upravnog vijeća Centralne banke Bosne i Hercegovine (CBBiH) 1. 11. 2017. godine preuzeo je mr. sci. Šerif Isović. Šerif Isović imenovan je za člana Upravnog vijeća CBBiH odlukom Predsjedništva Bosne i Hercegovine od 11. 10. 2017. godine, zamijenivši dr. Kemala Kozarića.

Šerif Isović rođen je 5. 4. 1962. godine. Nakon završene srednje Ekonomske škole i Ekonomskog fakulteta, stiče zvanje magistra ekonomskih nauka na Katedri za računovodstvo i reviziju Ekonomskog fakulteta Univerziteta u Sarajevu.

Od 14. 10. 2015. godine radi kao vršilac dužnosti direktora Porezne uprave FBiH. Tokom profesionalne karijere radio je od 1987. do 1990. godine u Poreznoj upravi kao općinski inspektor, od 1990. do 1993. u Gradskoj upravi prihoda Sarajevo kao gradski inspektor, od 1993. do 1994. u Finansijskoj policiji kao finansijski inspektor, od 1994. do 1998. godine kao direktor Porezne uprave Okruga/Kantona Sarajevo i član Izvršnog odbora Okruga Sarajevo do konstituiranja Kantona Sarajevo, od 1998. godine do 2002. u JP PTT saobraćaja BiH na poslovima savjetnika za finansije, od 2002. do 2005. godine u JP BH Pošta na radnom mjestu glavnog inspektora (internog revizora), 2005. godine do 2007. godine u BH Pošti kao izvršni direktor za ekonomsko-finansijske poslove, od 2007. godine do 2009. godine u BH Telecomu kao izvršni direktor za ekonomsko-finansijske poslove, od 2009. godine 2010. u Fabrici duhana Sarajevo kao izvršni direktor za finansije.

U periodu od 22. 3. 2011. godine pa do 13. 10. 2015. godine obavljao je dužnost člana Vijeća Agencije za poštanski saobraćaj BiH, a u periodu 9. 3. 2014. do 9. 3. 2015. godine dužnost predsjedavajućeg Vijeća.

Osim navedenog, obavljao je i brojne druge dužnosti kao što su: član Odbora za reviziju „JKP Tržnice Sarajevo“, član Komisije za ekonomska pitanja Kantona Sarajevo, direktor Interne revizije u „Energoinvest d.d. Sarajevo“, član Nadzornog odbora „BH Telecom“ d.d., član Nadzornog odbora „Centrotrans bus“ Sarajevo, član Komisije za budžet i finansije Kantona Sarajevo.



Završio je i brojne obuke (iz oblasti finansijsko-fiskalne politike, rada članova nadzornih odbora, korporativnog upravljanja, rješavanja krize upravljanja, analize finansijskih izvještaja, uspješne naplate potraživanja, direktne prodaje, mrežnog marketinga, internog audita kvalitete, kontroling računovodstva, finansijskog upravljanja i upravljanja ljudskim resursima) te stekao certifikate na raznim poljima (certificirani računovođa, ovlašteni revizor, vještak ekonomske struke, podoblast finansije, tržišni odnosi i finansijsko izvještavanje te certifikat za rad u organima državne uprave).

Stalni je sudski vještak za finansije od 1997. godine te je autor većeg broja finansijskih vještačenja iz oblasti privrednih sporova, sporova iz radnih odnosa, privrednog kriminala, pranja novca i poreznih utaja.

Učesnik je i predavač na više međunarodnih simpozija, konferencija i fakulteta te je predavač u Edukativno-konsultantskoj firmi „FINconsult“ u školi za edukaciju kandidata za sticanje zvanja u finansijsko-računovodstvenoj profesiji te edukaciju vođenja poslovnih knjiga.

Autor je brojnih radova u naučno-stručnim časopisima te u zbornicima radova s međunarodnih konferencija.

IZVJEŠTAJ O REVIZIJI RAČUNA ZA SERVISIRANJE VANJSKOG DUGA

Revizorski tim Kancelarije za reviziju institucija BiH izvršio je reviziju računa za servisiranje vanjskog duga za 2015. i 2016. godinu. Mišljenje je, kako to revizori stručno kažu, „bez kvalifikacije“, tj. pozitivno – Centralna banka Bosne i Hercegovine (CBBiH) je u svim materijalno značajnim aspektima postupala u skladu s Ugovorom s Ministarstvom finansija i trezora BiH i nije bilo primjedbi na uspostavljeni sistem internih kontrola i procedura u Odjeljenju za servisiranje vanjskog duga CBBiH.

Rukovodstvo CBBiH odgovorno je za poštivanje Ugovora o servisiranju vanjskog duga u dijelu koji se odnosi na: a) otvaranje/zatvaranje računa za servisiranje vanjskog duga i njihovih podračuna; b) prijem i obradu uplata za servisiranje vanjskog duga; c) prijem, obradu i izvršenje naloga/instrukcija za servisiranje vanjskog duga; d) knjigovodstveno evidentiranje i izvještavanje; e) ostale poslove koji se mogu javiti u cilju blagovremenog servisiranja vanjskog duga, a uz prethodnu saglasnost ugovornih strana. CBBiH osigurava izvještaje o izvršenim promjenama i stanju na računima za servisiranje vanjskog duga, a računovodstveni i finansijski izvještajni sistemi računa za servisiranje vanjskog duga će pratiti međunarodne računovodstvene standarde.

Također, CBBiH je odgovorna za uspostavljanje sistema internih kontrola i kreiranje internih procedura za servisiranje vanjskog duga kako bi bilo osigurano djelovanje u skladu s namjenom računa za servisiranje vanjskog duga i spriječena zloupotreba i neovlašteno korištenje sredstava s navedenih računa.

Revizija je izvršena u skladu s Međunarodnim standardima vrhovnih revizorskih institucija (ISSAI).

GUVERNER UČESTVOVAO U RADU MEĐUNARODNE KONFERENCIJE O TRENDOVIMA U BANKARSTVU I INFRASTRUKTURI FINANSIJSKIH TRŽIŠTA



Guverner Centralne banke Bosne i Hercegovine dr. Senad Softić učestvovao je u radu Međunarodne konferencije o trendovima u bankarstvu i infrastrukturi finansijskih tržišta koja je 9. 11. 2017. godine održana u Tirani, Albanija. Govoreći o finansijskim tržištima, finansijskoj inkluziji i značaju njihove uloge u daljem razvoju makroekonomske i finansijske stabilnosti, guverner je na početku svoje prezentacije ukazao na strukturu finansijskog sistema u BiH koji čine:

1. valuta;
2. platni sistemi,
3. finansijski posrednici i njihovi regulatori/supervizori banke (23 + 2 razvojne), osiguravajuće kompanije (27 + 1 reosiguranje), investicijski fondovi (38), lizing preduzeća (6), MKO (24), brokerske kuće (15). Regulatori su na entitetskom nivou koordinirani na državnom nivou, osim za posrednike na tržištima kapitala. Postavlja se pitanje jesu li nam potrebni dodatni posrednici poput investicijske banke i štedno-kreditne zadruge;
4. finansijska tržišta i njihovi regulatori/supervizori dvije berze, dvije komisije za vrijednosne papire, dva registra vrijednosnih papira, uz pitanja šta je s tržištem novca (visoka solventnost i kratko dospijanje), "cash" (spot) tržištima (dobra prodava za gotov novac s trenutnim prenosom vlasništva), tržištima derivatima i deviznim tržištima.

Ukazujući na procjenu rizika u finansijskom sistemu, guverner je istakao potencijalno potcijenjene rizike u bankarskom sistemu, kao što su vladine obveznice koje su najčešće ponuđene po unaprijed regulisanim cijenama umjesto po tržišnim, a banke su česti kupci, potom potencijalna precijenjenost vrijednosti nekretnina, što na malom ograničenom tržištu može stvoriti značajne posljedice po klijente banaka i po same banke te smanjene mogućnosti ublažavanja ostalih rizika. S obzirom na to da je sistem dominantno bankarski, kao i na izostanak velikih domaćih ulagača, ne postoji realna procjena kreditnog rizika za domaća preduzeća.

Kada je u pitanju finansijska pismenost, guverner CBBiH istakao je da su makroekonomski udar 2008. kao i kolaps tržišta kapitala 2007. ukazali na veoma nizak nivo finansijske pismenosti. Trenutnim aktivnostima se uglavnom ističe nužnost boljeg vođenja računa o uravnoteženosti budžeta, boljeg upravljanja troškovima ili boljeg razumijevanja finansijskih ugovora i osnovnih postulata bankarstva. Podaci koji se odnose na finansijsku inkluziju pokazuju da građani koji su bili ili koji su sada u radnom odnosu imaju bankovni račun, a to je slučaj i sa značajnim brojem penzionera te da je značajan je broj korisnika tradicionalnih bankarskih proizvoda.

MARICA BULIĆ ZAMJENICA GLAVNOG INTERNOG REVIZORA CBBiH UMJESTO ANGELE MEDIĆ

Zamjenica glavnog internog revizora u Uredu glavnog internog revizora Centralnog ureda Centralne banke Bosne i Hercegovine (CBBiH) Angela Medić razriješena je navedene dužnosti zaključno sa 30. novembrom 2017. godine, kada joj je prestao radni odnos u CBBiH zbog navršenih 40 godina staža osiguranja i ostvarivanja prava na starosnu penziju. Za zamjenicu glavnog internog revizora, umjesto Angele Medić, imenovana je Marica Bulić, na mandatni period u trajanju od četiri godine, počevši od 08.12.2017. godine do 07.12.2021. godine.

PREZENTACIJA ZAKLJUČAKA IZ IZVJEŠTAJA MMF-a „REGIONALNE EKONOMSKE PERSPEKTIVE ZA EVROPU ZA JESEN 2017. GODINE“

Ekonomski rast u Evropi je vrlo snažan i u ovoj godini je zabilježen u svim zemljama Starog kontinenta, izjavio je u Sarajevu Jorg Decressin, zamjenik direktora Međunarodnog monetarnog fonda (MMF). MMF je 13. 11. 2017. godine, u prostorijama Centralne banke Bosne i Hercegovine (CBBiH), predstavio zaključke iz izvještaja MMF-a „Regionalne ekonomske perspektive za Evropu za jesen 2017. godine“.

Ovo je prva godina nakon globalne ekonomske krize da su sve zemlje Evrope zabilježile rast.

„Očekujemo da će u srednjem roku biti nastavljen ovaj snažan rast u Evropi. Međutim, postoje određeni rizici. U kratkom roku može biti nekih iznenađenja koja su naizgled pozitivna. Rast može biti jači nego što je očekivano. U srednjem roku očekujemo neka negativna iznenađenja koja su vrlo moguća, poput određenih geopolitičkih rizika i određenih razvoja događaja na finansijskim tržištima“, rekao je Decressin. On je dodao da je izazov u ovim „dobrim vremenima“ kako izgraditi dovoljno fiskalnog prostora za manevrisanje i smanjenje fiskalnih deficita.

Kada je riječ o BiH i njenom evropskom putu, zamjenik direktora MMF-a je kazao kako ostaju izazovi unapređenja upravljanja i unapređenja rada institucija, a posebno pravosuđa.

Što se tiče programa koji BiH ima s MMF-om, Decressin je kratko prokomentarisao zašto MMF insistira na povećanju akciza na gorivo u BiH.

„Ono što mi želimo vidjeti u programu s BiH jeste jači rast. Ono što bi postalo moguće s novim akcizama u BiH jeste da se oslobodi velika količina finansiranja koja je neophodna za izgradnju infrastrukture. S izgradnjom infrastrukture to bi značilo više rasta, više radnih mjesta, više prihoda za ljude, a to

bi samo po sebi dalo poticaj boljem sveukupnom rastu u BiH“, poručio je Decressin.

Guverner Centralne banke Bosne i Hercegovine (CBBiH) dr. Senad Softić pozdravio je sve koji su prisustvovali prezentaciji izvještaja MMF-a, istakavši da je ona vrlo važna za BiH, jer pruža mogućnost uporedbe ekonomskog razvoja, rasta i ambijenta u BiH u odnosu na zemlje regije. Za BiH je, kako je rekao, veoma bitno da rast u Evropskoj uniji bude nastavljen u srednjoročnom periodu.

„EU je naš najvažniji trgovinski partner i strani investitor. Velika bosanska dijaspora šalje doznake koje iznose blizu 12 posto BDP-a godišnje. To su veoma jake ekonomske veze koje treba posmatrati zajedno s našom dijasporom kao važan resurs za ekonomski razvoj zemlje. Međutim, oni koji definišu politike u Evropi, i takođe ovdje u BiH, treba da iskoriste oporavak radi implementacije ambicioznih ekonomskih mjera i strukturalnih reformi“, kazao je guverner Softić.

Prema guvernerovim riječima, kada je BiH u pitanju, potrebno je fokusirati na tri velike oblasti: prvo, popraviti strukturu budžeta na svim nivoima vlasti. Generane vlade BiH su na putu da dostignu kombinovani ukupni fiskalni suficit drugu godinu uzastopno. Međutim, mora doći do preusmjeravanja potrošnje prema infrastrukturi, što će pomoći u sustizanju evropskih standarda i poboljšanju povezanosti i konkurentnosti bh. privrede. Drugo, kazao je guverner, neophodno je nastaviti jačati jedinstveni finansijski sistem BiH. Bankarski sistem u BiH je jak i stabilan. Ima dovoljno likvidnosti i dovoljno kapitala. Napredak je napravljen od 2015. godine, uspostavljanjem nove bankarske regulative, koja bosanskohercegovački bankarski sistem približava evropskim standardima.





Ipak, ostalo je još puno posla da se uradi za rešavanje problema iz prošle finansijske krize. S više od 11 posto od ukupnih kredita, nekvalitetni krediti nastavljaju da opterećuju bilanse banaka. S tim u vezi, usvajanje nove regulative o stečaju na entitetskom nivou i razjašnjenje poreskog tretmana prodaje nekvalitetnih kredita će pomoći u rešavanju ovog problema u narednom periodu.

I treće, poručio je guverner, treba udvostručiti napore za poboljšanje institucija i rešavanje nedostataka u upravljanju. Strane direktne investicije su zastale na oko dva procenta

BDP-a godišnje. Ovo je suviše malo da bi se podržala veća stopa rasta koja će smanjiti nezaposlenost i iseljavanje.

„Poboljšanja u kvalitetu regulative, poštena i transparentna 'pravila igre' i transparentne i odgovorne institucije će pomoći da se privuče više stranih investicija. Stoga moramo poslati jasnu poruku o pozitivnim rezultatima naših reformi, povećati reputaciju BiH, poboljšati konkurentnost kako bismo povećali investicije i rast, a istovremeno ojačali jedinstveni ekonomski prostor kako bi konačno popločali put ka našoj evropskoj budućnosti“, zaključio je guverner Softić.

INSTITUT ZA MEĐUNARODNE I RAZVOJNE STUDIJE IZ ŽENEVE OBJAVIO NAUČNOISTRAŽIVAČKE RADOVE UPOSLENIKA CBBiH

U sklopu Programa bilateralne pomoći i izgradnje kapaciteta centralnih banka, koji finansira Vlada Švajcarske, a implementira Institut za međunarodne i razvojne studije iz Ženeve, objavljeno nekoliko naučnoistraživačkih radova naših kolega iz Centralne banke Bosne i Hercegovine (CBBiH), uz mentorstvo profesora s Instituta. Objavljeni su sljedeći radovi: *The Determinants of Excess Liquidity in the Banking Sector of Bosnia and Herzegovina*, koautora Elme Hasanović i Tanje Latić, 2017; *Exogenous Macroeconomic Shocks and their*

Propagation in Bosnia and Herzegovina, Bojan Baškot, 2016. *Empirical Evidence for the Bank Lending Channel in Bosnia and Herzegovina: Does Lending Differ between Large and Small Banks*, Dejana Kovačevića, 2015.

Radovi su objavljeni na web stranici Instituta za međunarodne i razvojne studije iz Ženeve, ali i na web stranici CBBiH, imajući u vidu značaj ovih radova za reputaciju CBBiH. Iskrene čestitke kolegicama Hasanović i Latić i kolegama Baškotu i Kovačeviću.

DOPRINOS CBBiH NA IZRADI AKCIJSKOG PLANA ZA IMPLEMENTACIJU KOMUNIKACIJSKE STRATEGIJE ZA INFORMISANJE JAVNOSTI O PROCESU PRISTUPANJA BiH EVROPSKOJ UNIJI ZA 2018. GODINU

Služba za odnose s javnošću je, kao i godinu dana ranije, dala svoj doprinos u pripremi prijedloga za izradu Akcijskog plana za implementaciju Komunikacijske strategije za informisanje javnosti o procesu pristupanja BiH Evropskoj uniji za 2018. godinu.

Naime, Vijeće ministara Bosne i Hercegovine je na sjednici održanoj u januaru 2017. godine usvojilo Informaciju o pripremi prijedloga Akcijskog plana za implementaciju Komunikacijske strategije. Usvojen je Akcijski plan za 2017. godinu čijem kreiranju je doprinos dala i Centralna banka Bosne i Hercegovine (CBBiH) delegirajući tri aktivnosti u kontekstu evropskih integracija koje su i realizovane: održavanje konferencije, izdavanje publikacije i edukacija učenika i studenata o aktivnostima CBBiH u procesu pristupanja EU. Direkcija za evropske integracije je zadužena da u saradnji s nadležnim institucijama, među kojima je i CBBiH, pripremi Prijedlog Akcijskog plana za 2018. godinu i dostavi ga Vijeću ministara BiH na razmatranje i usvajanje. S tim u vezi,

CBBiH je delegirala sljedeće aktivnosti:

- Unapređenje Jedinstvenog registra transakcijskih računa u skladu sa standardima Evropske unije
- Unapređenje Centralnog registra kredita u skladu sa standardima Evropske unije
- Projekat uspostavljanja SEPA – unapređenje žirokliringa u skladu sa standardima Evropske unije
- Aktivnosti na promociji svijesti o procesu EU integracija – organizacija prezentacija, prenos znanja o institucionalnoj strukturi i funkcijama EU/ESCB komiteta, EU preporukama i kriterijima, statusu Upitnika.

CBBiH U SARADNJI S EFSE IZDALA PUBLIKACIJU „NOVKO I NOVČICA U SVIJETU NOVCA“ I LETAK O ŠTEDNJI



upravljanju novcem. Provodeći aktivnosti, CBBiH nastoji i želi postići veći stepen finansijske pismenosti i uključenosti djece i mladih. Posjeta učenika osnovnih i srednjih škola, kao i studenata iz cijele BiH, sastavni je dio finansijske edukacije koju CBBiH provodi posljednjih godina.

„Provodimo različite aktivnosti finansijske edukacije kroz interaktivne radionice, kvizove, tokom kojih se učenici upoznaju s radom i ulogom CBBiH, kako da se odnose prema novcu, štednji te ih upoznajemo s osnovnim karakteristikama finansijskih proizvoda. Smatramo da finansijska edukacija djece treba da počne što ranije, da nauče da razlikuju želje od potreba, da razumiju koncept i prednost štednje“, kaže guverner CBBiH dr. Senad Softić.

U okviru finansijskog opismenjavanja djece i mladih koje provodi Centralna banka Bosne i Hercegovine (CBBiH), u saradnji s Evropskim fondom za jugoistočnu Evropu – Development Facility (EFSE), kreirala je i objavila publikaciju za djecu pod nazivom „Novko i Novčica u svijetu novca“. Ovo je prva publikacija ovakve vrste za djecu osnovnoškolskog uzrasta u BiH koja djeci daje mogućnost da nauče šta je novac i koja njegova svrha, zatim šta je valuta te osnovne informacije o bh. valuti – konvertibilnoj marki i njenim zaštitnim obilježjima. Za srednjoškolce, CBBiH i EFSE objavili su letak pod nazivom „Šta je štednja?“, u kojem su date informacije o razlozima za štednju, kako odrediti iznos novca za štednju, vrstama štednje, da li je uštedjevina u bankama sigurna i da li je štednja u KM sigurna.

Finansijsko opismenjavanje djece i omladine je veoma važno, jer predstavlja kvalitetnu osnovu sticanja znanja upravljanja novcem, kao i vještina potrebnih za donošenje svakodnevnih finansijskih odluka. U razgovoru s pedagozima i profesorima osnovnih i srednjih škola koji su posjećivali CBBiH često je isticano da bi uvođenje predmeta finansijska edukacija bilo veoma korisno, jer finansijska edukacija stvara mogućnost da osoba bude finansijski pismena, time i odgovorna u



ISTEKAO ROK ZA ZAMJENU NOVČANICA OD 50 F, 1 i 5 KM



Rok za zamjenu novčanica konvertibilne marke apoena 50 feninga, 1 i 5 konvertibilnih maraka istekao je 31. 12. 2017. godine.

Navedene novčanice su već prije povučene iz opticaja te su prestale biti zakonsko sredstvo plaćanja.

Novčanice apoena 50 F povučene su iz opticaja 31. 3. 2003. godine, novčanice apoena 1 KM povučene su 31. 3. 2009. godine, a novčanice apoena 5 KM 31. 3. 2010. godine.

Odlukom Upravnog vijeća Centralne banke Bosne i Hercegovine iz oktobra 2012. godine, rok za zamjenu ovih novčanica u komercijalnim bankama produžen je do 31. 12. 2017. godine, nakon čega ih komercijalne banke neće više primati.

CBBiH povučene novčanice od komercijalnih banaka preuzima sukcesivno, putem izdvojenih trezora, a preuzimaće ih najdalje do 31. 3. 2018. godine.

U CBBiH ORGANIZOVAN NOVOGODIŠNJI KOKTEL ZA NOVINARE

Kao i svih ranijih godina, i uoči Nove 2018. godine, organizovano je novogodišnje druženje guvernera s novinarima. Pozdravljajući novinare, guverner Centralne banke Bosne i Hercegovine (CBBiH) dr. Senad Softić zahvalio je predstavnicima medija na redovnom i korektnom praćenju aktivnosti CBBiH, iskazavši posebno zadovoljstvo njihovim angažmanom tokom obilježavanja 20. godišnjice CBBiH. Guverner se i ovom prilikom osvrnuo na rezultate poslovanja CBBiH u 2017. godini te ukazao na najvažnije makroekonomske pokazatelje za BiH. Posebno je istakao da su devizne rezerve premašile iznos od 10 milijardi KM te da je to najveći iznos deviznih rezervi od osnivanja CBBiH. Svim medijima i novinarima poželio je sretnu i uspješnu 2018. godinu, kako na ličnom tako i na profesionalnom polju.



